

■ GLOSSA

Devoziuns dal cuschinar e survegnir cuschinà

DA SILVIO CAMENISCH

Nua che jau guard han lieu devoziuns dal cuschinar. Jau na savess betg in chanal che n'emettess betg ina u l'otra bella devoziun dal cuschinar sez u anc meglier survegnir cuschinà. Bain. Noss chanal lateral da la televisiun rumantscha – per ils noss, cun dals noss e sur dals noss – anc oz betg s'accurschi il basegn dal temp e da la moda ed era endrizza in studio da cuschinar cun sala per il public cun tut quai ch'i dovra: per cuschinar, celebrar, mangiar, adular, engraziar.

La bellezza devoziun herzhaf & süss: cun Alfons Schuhbeck cun Angelika Schwalber da dumengias sairas manchent jau mai. Jau mai. È il star cuschinier Schuhbeck in papa da la baselgia catolica culinaria, è la maistra conditira Schwalber tuttina d'asper il papa ina bella gidantira pastoral. Immerhin. Jau na di ussa betg die Schöne und das Biest, la Bella ed il Biestg, ditg sin bun rumantsch.

Uss en quellas devoziuns, culinarias, herzhaf & süss, tge che quai vegn flattà, adulà, stri-



tgà il mel tras la bucca tranter quels dus. «Alfons, tia spargia cun sosa ollandaia ed ingwer è extra classa.» La bella ri da cor e dulutsch. «Angelika, e tes raffinads macarons champagner rosé èn in pur daletg per la bucca», di il papa cuschinier da la Baviera cun tschegnada a la bella maistra conditira. «Weisst du, Alfons...», «Ja, liebe Angelika...» va quai uschia enavant cun adulaziuns durant l'entira devoziun fin la fin, culinaria.

Da l'auzar si, culinaria, auza papa Alfons Schuhbeck ina ostia ingwer e di guardond vi tar l'Angelika a la maisa: «A bissl Ingwer, Angelika, kannst gar nimmer krank werden. Aber die Leut nehmen lieber Pillen, das ist bequemer. Der arme Arzt muss dann alles reparieren.» E papa Alfons vegn datiers en

la camera, vegn uschia tar nus en chasa, na stuain nus betg ir dador en tutta fragaglia: «Probiert's des daheim mal aus, dann werdet ihr's schon sehen.»

En devoziuns uschia «herzhaf & süss» van ins gugent a messa cun pervegiari culinaric. Ils studios da devoziuns dal cuschinar ubain survegnir cuschinà fullanadas sin il davos plaz. Qua pudess la concorrenza guardar giu insatge. Tge ch'ins fa qua meglier, ch'ins fa là ussa main. Da l'Alfons e l'Angelika na dependa quai betg. Quels dus «herzhaf & süss» sa vendan dal meglier.

Fiss ussa temp, dunna Heimgartner, directura responsabla per noss programs. Il signur directur general Tschuor è gea i, El è stà in temp tranter nus, n'è puspè in temp betg pli tranter nus, ma vegn a vegnir puspè. Vegnissan nus er insacur en quest tschien-taner tar nossa emissium, jau manegel devoziun culinaria permanenta en noss studio rumantsch cun plaz per in pievelun!? La gliued adattada avessan nus, mettess jau mes maun en il feu. So, chara Ladina, directura responsabla, guttas cun chau!